

東
華
續
錄

東華續錄

同治九十四

臣王先謙敬編

臣張式恭恭校

六月甲寅朔諭軍機大臣等景廉奏籌辦兵餉各事宜並探聞烏魯木齊軍情請飭黑龍江馬隊全數赴營哈密採辦軍糧各摺片烏魯木齊淪陷已久見在逆回與安集延互相攻擊機有可乘自應厚集兵力迅圖克復景廉所部官軍僅十餘營不敷分布刻下秦晉邊防較鬆著定安於綏遠城防軍內酌撥馬步勁旅二千名派得力大員統帶赴景廉軍營以資攻剿景廉見擬採買駝隻及籌撥軍裝等項需款甚急著李鴻章吳棠錢鼎銘丁寶楨鮑源深邵亨豫李瀚章郭柏蔭於各該省欠解新疆軍餉及景廉協餉內無論如何爲難各先行籌撥銀六七萬兩迅速解至察哈爾收存

景廉擬於此項銀兩內提銀十萬兩買駝五千隻以一半爲口北歸綏兩道運送米麵之需其餘一半駝隻卽於新調兵勇出口時馱運軍火口糧乘便解至景廉軍營並再提銀十萬兩作爲官兵出口製辦軍裝裹帶之用其餘銀兩分起解交景廉應用均著照所請辦理該都統所部需用糧石請由口北歸綏兩道每月各運解京斗粟米四百石著李鴻章定安督飭該道等照數籌辦至所請在察哈爾設立糧臺在蒙古地方採買駝隻轉運軍糧及征兵出口事宜責成一手經理等語著李鴻章額勒和布會商辦理烏魯木齊回逆約會鄉團徐學功同攻安集延是否該逆有悔罪輸誠之意如果真心向化獻出城池不妨赦其前罪予以自新著景廉相機妥辦所請將徐學功等分立營名仍著飭令張玉春等妥爲鈴束以資得力科城截留黑龍江馬隊前據奎昌等奏到未經

允准此項馬隊著奎昌多布沁札木楚志剛常順保英飭令吉爾
洪額星速統帶前進毋稍遲延景廉軍營需餉甚多不能盡由內
地運解若就哈密一帶採買自較便捷著文麟遇有景廉委員赴
哈採糧或左宗棠派員出關卽行妥爲照料督飭設法趕辦不得
稍存膜視致誤軍糈將此由六百里各諭令知之○丙辰以舉行
大婚禮封 皇后阿魯特氏父翰林院侍讀崇綺爲三等承恩
公母宗室氏瓜爾佳氏均爲公妻一品夫人○丁巳移甘肅平慶
涇道駐平涼府城改甯夏水利同知爲甯靈撫民同知○戊午飭
福建等省迅解貴州欠餉○己未諭軍機大臣等左宗棠穆圖善
奏馬步兵勇勦賊獲勝邵亨豫奏零匪竄越陝境派軍追勦等情
各一摺蘭州附近防軍在黃羊川等處截擊回匪均有擒斬著左
宗棠穆圖善督飭該將弁等搜捕竄賊悉數殲除並隨時確探嚴

防不得稍涉疏懈甘省零股賊騎越入陝境由中部宜君界直竄白水經譚仁芳等軍進剿由澄城縣西遁其竄擾紅流河一帶賊匪經延榆綏鎮道派隊擊散著邵亨豫嚴飭譚仁芳等會同曹克忠駐紮王家角等營將竄陝匪股痛加剿洗毋任日久蔓延致地方又遭蹂躪並著左宗棠飭令甘境防軍實力堵截以收夾擊之效河州回眾投誠曾否將馬匹器械依限繳齊就撫回戶已否編查約有若干著左宗棠將見辦情形詳細奏聞以慰廬繫其陝北賑墾事宜邵亨豫當慎選賢能牧令盡心經理務臻妥善以期地方日有起色將此由五百里各諭令知之○庚申諭軍機大臣等金順奏督隊分起西進並豫籌沿途轉運事宜一摺金順接奉前旨後已令劉宏發統帶頭隊於六月初六日啟程各隊挨次繼發該將軍亦卽於十六日督率後隊西行卽著趕緊前進毋稍紆遲

俟行抵甘涼鎮番等處一面扼要駐紮一面迅速奏聞該將軍因經過蒙古地方暨甯夏所屬各處臺站廢弛擬由營添設運局轉解糧餉軍火續設馬撥馳遞摺報公文均著照所請辦理甯夏近日漸有存糧應否設局採買接濟軍食卽著金順道出甯夏時與張曜妥速籌商奏明辦理將此由五百里諭令知之○甲子諭內閣前據朱鳳標因病兩次奏請開缺疊次降旨賞假調理茲據奏稱假期屆滿病尙未痊仍懇開缺等語朱鳳標年逾七旬精力尙健襄贊綸扉深資倚畀今以病未就痊復請開缺情詞懇摯自應勉如所請朱鳳標著以大學士致仕加恩賞食全俸俾資頤養用示眷懷耆碩恩禮優加至意○吏部以大學士瑞麟李鴻章應定何殿閣請得旨瑞麟著授爲文華殿大學士李鴻章著授爲武英殿大學士○命文祥爲大學士以全慶協辦大學士○調寶鋆爲

吏部尚書載齡爲戶部尚書以英桂爲兵部尚書

由內大臣遷

○丁卯

諭軍機大臣等王文韶奏援黔官軍埽除竄匪苗疆肅清並分軍設防撫恤降眾各摺片烏牙坡苗匪蕩平後逆首金大五竄伏香鑪山麓白水崗經提督唐本有等設伏誘擒復將漏網髮逆李七一股悉數殄除並擒斬著名逆首多名其香鑪山頂踞匪亦已殲除苗疆一律肅清辦理甚爲妥速所有擒斬首逆尤爲出力各員著王文韶先行酌保數人以示鼓勵此次苗疆平定當籌一勞永逸之計清水南北兩岸降苗爲數甚眾一切善後事宜自應妥爲經畫王文韶見派各軍分段設防並籌撥銀兩分別撫恤實能力顧大局著卽飭令道員陳寶箴會同分防各營及各該地方官體察情形妥籌辦理曾璧光亦當派委明幹大員將下游一帶新復地方應辦事宜次第經理以圖久遠相安從前漢人視苗人如奴

隸多方陵虐以致激成變端皆由地方官不能豫爲勸導之故著
曾璧光嚴飭地方官曉諭苗漢各民嗣後務須各安生業不得互
相猜忌遇有詞訟案件是非曲直悉由該管官秉公剖斷毋許稍
有偏循用副朝廷一視同仁至意王文韶另片奏擬將苗疆形勢
險夷及用兵先後情形查覈臚陳等語著卽確切查明詳細陳奏
將此由五百里諭知王文韶曾璧光並傳諭周達武知之○停本
年秋審朝審句決○以單懋謙協辦大學士○命文輝來京以劉
秉璋爲江西布政使
前山西布政使○戊辰諭軍機大臣等錢鼎銘奏匪
徒拒捕派兵查拏一摺河南固始匪徒李六句結安徽霍邱縣李
四聶子在固境之裴家冲等處滋擾經錢鼎銘派兵前往查拏竟
敢拒捕竄逸見在匪首李六占踞霍境之葉家集附近民寨李四
聶子占踞李世忠族姪李德橫莊圍煽惑劫奪亟應及早捕治以

靖地方錢鼎銘見派趙鴻舉等帶兵往捕卽著飭令該總兵等迅將匪黨盡數殲除淨絕根株毋畱餘孽並著英翰檄令郭寶昌派隊一體堵拏毋令一名漏網李四鼐子一名李昭柱係李世忠族弟李世忠見赴江甯著何璟飭令迅卽回籍將李四鼐子送官究治不得稍有徇庇將此由五百里各諭令知之○癸酉諭軍機大臣等錢鼎銘奏會合皖軍擒獲匪首一摺固始匪徒李六勾結李四鼐子聚眾滋擾占踞圍寨見經豫皖各軍合力圍剿業將李四鼐子及頭目吳長林張上銀等七名立時擒獲餘匪逃散此等匪徒膽敢勾眾拒捕亟應卽時撲滅以淨根株李六一名見在未經弋獲且餘匪四散尤虞再行勾結餘燼復燃著英翰錢鼎銘分飭崔廷桂牛師韓等合力搜捕務將李六擒獲正法餘匪盡數捕拏以清餘孽而靖地方將此由五百里各諭令知之○乙亥諭五城

御史整頓捕務○允豐紳等奏豁免甯夏滿營生息銀五萬五千兩○已卯諭軍機大臣等英翰奏官軍越境剿除叛匪一摺匪徒李四輩子等與漏網擒逆張振科勾結滋事經皖豫各軍合力圍剿已將李四輩子張振科擒獲正法餘黨殲除殆盡辦理尙屬迅速惟逆匪李六隻身潛逃仍未弋獲著英翰錢鼎銘分飭弁勇及各該地方官嚴密躡緝並知會鄰近各省一體兜拏此外有無餘匪務期搜捕淨盡毋畱餘孽將此諭令知之○以安徽河南交界地方殲擒逆匪賞提督牛師韓頭品頂帶子副將徐思忠以總兵官簡放○辛巳諭軍機大臣等左宗棠等奏搜捕巴家臺賊巢生擒匪首一摺蘇家西兒糾聚逃匪窩伏平番紅城後山之巴家臺恃險負隅經豫師函商左宗棠穆圖善密派兵勇前往剿捕參將周興祿率眾攻破賊巢守備劉定國將蘇家西兒擒獲餘賊亦

皆殲斃卽著該大臣等督飭各軍將在逃匪黨悉數搜捕此外有無賊巢仍飭隨時探剿盡絕根株河州等處軍情及見在辦撫事宜有無頭緒並著左宗棠恪遵前旨將詳細情形據實具奏將此由五百里各諭令知之○壬午以孟秋時享 太廟 上前期親詣行禮

秋七月癸未朔諭內閣劉嶽昭等奏官軍攻克興義府城一摺貴州興義府城久被回匪盤踞爲滇黔兩省邊患經該督撫等派軍會剿疊有斬擒本年四月間總兵吳奇忠等攻入外城奪據礮樓道員沈壽榕吳德溥復會督各軍晝夜環攻該逆抵死抗拒二十五日滇軍設伏城南黔軍前隊由北奮擊賊見北門攻急奔赴抵禦滇軍卽乘虛由南門越濠架梯而入殲斃悍賊二千四百餘名生擒九百餘名當將興義府城克復剿辦尙爲得手卽著督飭官

軍將新城賊巢剋期攻拔以靖黔疆○諭軍機大臣等榮全奏回抵塔城籌辦各務富和奏酌覈軍餉以資要需並接濟庫倫托海人眾各摺片前據總理各國事務衙門奏與俄使辯論交收伊城各事大概情形業經函知榮全相機商辦該署將軍旋回塔城後俄人有無覆音其在塔境三工河灣等處駐紮兵隊有何動靜仍著察看情形按照總理衙門函知各節詳慎籌辦瑪納斯爲伊犁東來要地自應早籌克復以資控扼榮全見已派員馳赴沙山子等處查探情形著卽催提吉林馬隊到齊認真整頓豫籌調度景廉亦當督率張玉春等速籌進兵機宜並隨時咨商榮全互相策應以期共維大局富和所奏布倫托海農民開墾耕種及十蘇木臺站雇覓駝馬需用銀兩暫由榮全餉下借銀四千七百餘兩並請飭部撥銀二萬兩或由何項專款動用或暫由科城那款濟急

等語著戶部卽照所請籌撥應用撥款未到以前仍著榮全酌量緩急通融接濟厄魯特十蘇木人眾從前暫歸科城管轄見在富和既經到任自應仍歸塔爾巴哈台接管以符舊制著常順保英卽將未了各案件移交富和接辦此項人眾情形困苦該參贊務當加意撫綏毋令失所需用鹽糧並著查照向章奏明撥用將此由六百里各諭令知之○諭榮全奏補償俄款事竣請飭催款項一摺據稱山西奉撥應還俄款同治九十年先後解到銀兩業已歸還該國本年再還俄鈔四萬張卽埽數全清惟見在日期已迫山西應解此項銀兩尙未接准起解來文請飭迅速撥解等語著鮑源深將山西奉撥本年應償俄國銀兩按照從前奏定數目趕緊解至烏里雅蘇台轉解應用不得稍有遲緩將此由五百里諭令知之○予貴州陣亡遊擊楊佑祿祭葬世職○丙戌諭軍機

大臣等文彬奏拏獲著名幅匪並按捕餘匪情形一摺匪犯朱小五於上年夏間在仰化集勾通朱憬堂等結幅聚眾擾害地方見經清淮官軍會合各該州縣文武盡力按捕先後剿除匪黨多名並將匪首朱小五朱憬堂拏獲正法辦理尙妥著何璟張樹聲文彬飭令派出各員會同各該地方官迅速將逸匪朱方茂等嚴密躡緝務期全數弋獲不准一名漏網此次出力各員著准其彙案保奏毋許冒濫將此諭知何璟張樹聲並傳諭文彬知之○以張樹聲署江蘇巡撫文彬仍署漕運總督○戊子諭鮑源深嚴緝游勇並禁種罌粟○己丑左宗棠奏河州土回馬占鰲馬尕大等懇誠求撫自限分途按戶搜繳一月完竣復繳馬五百餘匹槍械稱是出具並無隱匿存畱切結計先後共呈繳馬匹已四千有奇槍矛一萬四千有奇候補按察使陳湜委員同時分起赴各鄉按村

勘驗無異方馬占鼇之自限分途投繳馬械也各遣子並偕各回
目馬承瑞等十二人赴安定軍前獻馬五十匹具稟悔罪投誠臣
宗棠宣布朝廷威德諭以死生禍福聽其自取比仍縱令歸巢催
繳馬械該回民畏疑益釋誓爲良民至是具報馬械盡繳乃明白
曉示准其就撫也辦撫之道以編審戶口爲要編審戶口以遷徙
客回安輯土回爲要河州境周五六百里回多漢少雜以番眾同
治元年變亂以來陝回多避居其中自陝境肅清金積塢蕩區原
東西山相繼平定所有各處倡亂之回多寄孥其間以避誅戮此
客回之應遷徙者也其本籍漢民有爲河回脅制甘爲役使名爲
隨教以圖保全者有仇隙已深逃至岷洮狄道充當勇丁而親屬
仍畱河境者宜分別拔出以免罣端此本境漢民之應遷徙者也
其外來漢民有因陝回裹脅而隨其同竄河境者有被河回裹脅

而認爲義子齒諸奴僕者應逐一勒令交出護送原籍以別種類而資完聚此外來漢民之應遷徙者也撫事既定乃次第圖之願謀遷徙必先定安插之地回漢各有攸宜漢民宜安插狄道金縣安定會甯一帶凡近城驛漢民聚積之處宜也回民則近城驛非所宜近漢莊非所宜併聚一處非所宜從前安插陝回如化平廳平涼縣大岔溝及北原各處丁口已一萬數千既未可多所附益又此次安插回民有籍隸陝西者有隸甘肅者當其併力抗拒官軍固無彼此之分也一旦繳馬械就撫還爲齊民則甫被新恩旋尋舊怨不但陝回與甘回氣類攸分卽陝回與陝回甘回與甘回亦有難並城而居者以撫局論分起安置渙其羣孤其勢計之得也卽以同情而論亦非分起安置不可乃豫飭安定會甯平涼隆德靜甯州各牧令覓水草不乏川原相間荒絕無主各

地自成片段者以使安置旋委員分途履勘乃度其地廣狹遷陝
回楊文彥一起二百五十三名口於平涼之謝家莊桃家莊遷陝
回張代雨一起二百九十一名口於平涼之張家莊曹家莊遷陝
回拜崇花一起五百三十七名口於會甯之姚王家曲家口遷陝
回馬生彥等一起六百四十三名口於靜甯州隆德縣境之王家
下堡劉戴家山遷陝回馬文元一起一百五十七名口於安定之
劉家溝遷陝回馬維驤一起七十四名口於安定之石家坪遷陝
回馬振清一起三百六十三名口於安定之好地掌遷甘回安鴻
慶一起四十三名於安定之劉家溝遷漢民陳富貴等四百四十
七名口於安定之青嵐山遷漢民董永海等一百零八名口於安
定之新套河遷漢民水映江一起四百二十八名於安定夏家營
防其陝回中親屬有已安置化平廳平涼縣境者漢民中親屬有

已流寓隴西狄道州各境者聽其自行拔赴完聚而皆給以賑糧大口每口八兩小口每口五兩其遷出稍晚尙能插種粟麩蕎麥者照所墾地畝給以籽種其節候已過不及下種者令其盡力耕墾以待明春所需農器及各器具必不可少者一律酌給惟陝回馮均祿一起住河州西北二百餘里黃河北岸已於彼耕墾栽種乞俟收穫後遷徙聽候安插而鹽茶固原回民從前寄居者尙待清查其應遷之漢民亦有求緩俟收穫者然丁口亦無多矣遷徙安置漸有頭緒乃令知河州知州潘效蘇赴河州知州新任新授河州鎮總兵沈玉遂帶所部後路五營赴河鎮任所署河州州判米聯璧赴太子寺分駐任所據潘效蘇稟報五月十三日到任沈玉遂稟報五月二十四日到任沿途漢回列案焚香迎送絡驛馬占鼇馬尒大馬永瑞及各回目阿渾等咸跪道旁膜拜感泣並約

納糧百萬斤備軍食因亂後空城僅存於關廂建知州官廨暫資
辦公沈玉遂五營列帳城中分飭所部四營各軍由城關外延紮
甯河一帶記名提督張仲春領所部宗岳六營進駐太子寺一帶
前接甯河後接七甲集等處記名提督陳廣發總兵凌春臺以所
部良輔平西等營駐三甲集前接七甲集後接康家巖洮河西岸
記名提督王衍慶所部左路五營及鎮西忠營兩營仍駐康家巖
西通三家集北連沙泥站南達狄道州東達站灘以抵安定提督
銜記名總兵張福齊所部六營由沙泥站分布北由阿干鎮以達
省城南出沙崙接康家巖分布之營布政使王德榜所部定西等
營仍駐狄道西北接甯河太子寺三甲集各營南接岷洮各營東
接鞏秦所屬各營河州撫局雖定而諸路聯絡布置仍未稍疏也
惟西北二百餘里循化同知所轄番回雜處毗連西甯卽前史所

稱吐谷渾地今爲撒拉回巢地險民悍爲甘肅邊患久矣亂後回番自相殘殺人物凋耗文武不能履任遂以化外置之茲因河州撫定撒拉各回亦赴軍前求撫陳湜訶知逆首狗齒牙卽楊繼芳馬彥濬馬龔子等敗後竄匿河州地境密諭馬占鼉掩捕馬占鼉陸續將狗齒牙馬龔子馬彥濬獲解其希圖立功自效之情尙似可信見籌辦理善後要務如清釐地畝編審保甲分給門牌安設驛站修葺城垣關隘各事宜正在次第辦理而今歲春夏之交雨澤早降夏收最稔秋稼亦卜豐登士民僉稱十數年來所未見尤爲意外之幸上忙已報開徵民閒輸將亦覺踊躍察看情形人情大定各路大致漸次肅清臣宗棠料理安畢卽可進駐省垣又奏肅州回逆自本年三月二十一日受創後日在城外及北巖頭塔爾灣等處增設堅卡爲負固計四月二十四五兩日副將桂錫楨

偪卡誘敵見大卡以外環築小卡賊縮匿不出兩次僅斃賊三十餘名生擒八名提督徐占彪飭所部滾營進偪二十七日參將齊懷松移紮中河橋甫定遽率百隊百騎覘賊將近塔爾灣見各卡外豐草繇芊牲畜遍野卽揮軍迅進殲牧馬賊十餘名而奪其馬卡賊出援齊懷松已整隊護所獲牲畜而返二十九日復率輕騎歷繞城西賊驅牲畜飲於河驟馬蹙之奪獲甚夥聞城中鐘聲旋起城中援賊爭出乃整隊歸賊不敢偪五月初一日桂錫楨率馬步疾抵城下城卡各出馬步賊數百列陣迎拒桂錫楨以步隊居中馬隊分兩路包剿奮威齊進賊奔趁勢猛追直抵東關口關閉不啟敗賊競逃入卡桂錫楨揮軍偪攻立破大卡一座賊墮壕死者頗多生擒馬元等五名斬以徇初三日桂錫楨以一營豫伏十里墩率三四兩起馬隊在肅州東角往來馳騁賊由東關突出馬

步千餘名奮前猛撲官軍且戰且走誘近十里墩東伏兵繞由賊後突起桂錫植回身夾擊賊遂奔潰追斬百餘名生擒十四名訊據獲賊及逃出難民合稱馬四分向關外及西甯各回族求援續有新出難民告知有關外賊目魁頭老四帶纏頭馬步賊三千餘人入城助守提督黃虎臣率軍偵之列隊河灘見城中花紅黑白各旗魚貫而出知爲賊之舊隊大黑旗繼出約眾二千餘計係關外新賊均排立城邊就渠沿環施槍礮誘之不前黃虎臣繞北路回營徐占彪以賊情狡詐必賺之遠出始克痛勦密飭歸化營回勇暗約馬四十八日出隊當作內應繞旗爲號是日徐占彪親率精銳乘夜潛出伏城西南老馬堡黎明先以步隊兩營逼城而陣賊眾爭出官軍且戰且退賊仍疑卻不前忽見歸化營在亂古墩上繞旗數轉喜內應已確大股突出桂錫植時伏深林中俟賊過

甫半橫截而出賊見伏兵無多尙令隊抵禦歸化營迎頭猛擊官軍繼之徐占彪由老馬堡分三路馳至徑衝賊隊縱橫盪決賊屍枕藉賊分兩股一趨城關一奔入朱家堡徐占彪一軍攻堡槍斃守賊甚眾賊殊死拒撤隊誘之賊復飛騎來援徐占彪縱擊斬賊多名將賊擊退並搜殺麥地伏賊數十名是役約斃賊數百名官軍亦有傷亡二十日黃虎臣以兩營移紮三仙洞距賊僅八里二十一日徐占彪繞城巡視賊環城列隊徐占彪折至塔爾灣賊出隊護牲畜殺賊十餘名五月初五日有馬賊數百竄擾撫彝境署甘涼道蕭宗幹聞報會商署甘肅提督楊占鰲撥隊截勦初六日楊占鰲飭提督張慶雲率隊將抵撫彝賊折竄東樂返轡追之賊搶掠牲畜駛赴山丹張慶雲躡蹤追擊初十日在紅寺湖小有斬獲十一日有另股馬賊竄鎮番署鎮番營遊擊李效見副將王禮

和會擊賊於唐家寨斃匪三四十名殲斃執旗賊目二名十二日又追及於爛泥溝賊不戰而走追斬十餘名是日張慶雲追抵黑城有股匪自扁都口竄出與前股合約共二千三四百騎張慶雲扼之駝嶺山賊竄入口十六日賊攻大馬營署永固協副將札拉芬與張慶雲會隊援之十八日戰於周家莊官軍被賊圍截傷亡頗多尙未據楊占鼇續報據署涼州府知府季守愚會報永昌永泉寺一帶時有賊蹤署涼州鎮總兵王仁和派隊在高古城擊賊獲勝是甘涼所報賊蹤均由西甯竄出也前據駐威遠之西甯鎮總兵黃武賢報陝回畢大才馬五九等糾眾二千援肅由大通北原竄出禹得彥白彥虎等悍匪多在其內以時地計之卽此股無疑據道員馮邦棟稟報西甯土回自上年首逆馬尕三死後兇燄漸銷見在同目馬永福頗明大義馮邦棟到碾伯後馬永福卽率

西甯咪喇溝西馬營各處回目傾誠求撫呈繳馬匹槍礮各數百
據稱陝回禹得彥白彥虎崔三等股佔據大小南川尙未就撫遷
巢慮其反噬不得不畱各馬步防之一俟陝回了事卽當悉數呈
繳不敢藏匿自誤陝回惟崔三求撫甚切其禹白等逆則自知稔
惡有年疑畏殊甚據撫回陳林等稱該逆等私議如官軍速進當
竄蜀竄滇以延殘喘崔三不能制也逆目畢大才等由大通北竄
赴肅州首逆馬四之援而禹白崔等三逆仍踞大小南川未嘗同
行也近又遣人詣馮邦棟求撫繳馬械各數十其藉此以緩官軍
之攻可知惟官軍進攻亦有未能速者由蘭州平番歷碾伯以抵
西甯路將千里輓運甚艱若因糧彼閒非七月初旬不可臣等飭
馮邦棟始諭其悉繳馬械勿違絕之一面飭馬永福馬占鼐先將
陝回去路遮截一面檄記名提督何作霖統領所部步隊六營益

以馬隊兩營由康家巖拔行前赴碾伯駐紮檄三品卿銜記名道
劉錦棠率步隊新舊四營馬隊兩起由平涼拔行臣宗棠益調陝
西補用直隸州知州龍錫慶率所部綏定兩營步隊會師碾伯繼
進計何作霖馬步八營此時已行抵平番劉錦棠七月初四五日
可抵蘭州比會師碾伯正當新糧收穫之時軍食無虞缺乏區區
之患以陝回首逆及各逆家口均在大小南川擬師指西甯攻所
必救畢大才等或當回援老巢官軍力戰破之然後分別勦撫可
速戎機也至肅州城堅濠深賊中積糧可支年許近於重濠外增
砌賊卡死守不出又購關外援賊前來徐占彪雖力圖攻拔恐亦
遽難得手據徐占彪密稟擬先刈近城四十里麥豆誘賊出擊相
機圖之臣等已飭其穩慎辦理候西甯事畢再籌會勦並多發攻
具助之上諭軍機大臣等河州土回馬占鼐馬尕大等瀝誠求

撫經左宗棠等宣布朝廷威德責令盡繳馬械准其投誠一面編查戶口將遷徙客回安輯土回各事次第籌辦又於安定會甯平涼隆德靜甯各屬度地廣狹分起安插陝回及漢民之無歸者並皆給以賑糧所籌均合機宜河州文武員弁見已分駐任所即著左宗棠督飭沈玉遂等加意拊循俾悔過自新之人咸知感憤庶可日久相安不至再生反側其太子寺等處要隘並著飭令張仲春等軍照常聯絡布置毋稍疏懈撤拉回目畏威求撫並著該大臣相度機宜一併妥爲籌辦西甯回目馬泳幅乞降而陝回禹得彥白彥虎等自知稔惡疑畏殊深且有官軍速進即當竄蜀竄滇以延殘喘之議不可不嚴爲之防左宗棠見飭馮邦棟一面諭令悉繳馬械一面密飭降回截其去路並分派各軍會師碾伯進規大小南川老巢所籌深協兵機即著督飭官兵密速剿捕毋令他

竄肅州城堅濠深徐占彪一軍雖屢攻獲勝仍當飭令穩慎進取不得稍涉疏虞竄陝零匪經陝防各軍截剿追至靖邊保安所屬該逆竄向草地而去邵亨豫當督飭譚仁秀等扼要駐紮嚴密布置以靖疆圉北山一路開墾漸多民食稍資接濟並著該署撫督率牧令勤求民瘼加意撫綏以副軫念災黎至意將此由六百里各諭令知之○諭景廉奏探聞西路軍情派兵助守古城定安奏遵撥隊伍馳赴景廉軍營文麟奏因病請假暫畱錫綸幫辦營務各一摺烏魯木齊回逆復與安集延勾結圖襲徐學功等營壘該營官等先期拔隊出險未爲所乘該逆等詭譎異常旋離旋合見既聯成一氣狼狽爲奸並欲乘隙東犯奇古該處防兵單薄亟應豫爲布置以備不虞景廉已檄派巴城綠營官兵暨靖邊後營頭起勇丁共計三百餘名馳赴古城協同防守務當飭令各營隨時

偵探設法堵禦力遏妖氛不得稍涉疏懈其靖邊後營左營勇丁抵坤後能否添撥前往並著景廉酌度辦理該都統軍營需兵甚急李天和所部各營即著成祿檄令迅赴巴城歸景廉調遣毋稍遲延該逆等豈敢相依兇燄漸熾著榮全迅即選派索倫等項官兵會合趙興體團勇進攻瑪納斯以分賊勢而杜詭謀定安見在派撥吉林黑龍江馬隊官兵一千名大同鎮屬步隊官兵一千名赴景廉軍營助剿即著趕緊部署剋期拔隊前進迅赴戎機文麟見因病乞假懇留錫綸在哈幫同辦理營務刻下西路軍情緊要景廉籌辦進剿佐理需人錫綸未可中途久滯姑允文麟所請賞假一箇月調理暫留錫綸在哈將該處防剿事宜隨時商辦文麟假滿後錫綸立即啟程迅赴景廉軍營不准再涉延宕將此由六百里各諭令知之○諭恩麟德泰奏廓爾喀國王例貢屆期援案

懇免暨達木蒙古番族被災請撥款撫恤各一摺廓爾喀王例貢屆期懇請赴京呈進見在陝南一帶隴回未靖道路通塞靡常若准其來京致該貢使阻滯中途徒勞跋涉殊非柔遠之道所有此次該國王應進貢物著照上屆成案准予呈進一次以示體恤至達木蒙古官兵及三十九族番民據恩麟等奏稱於同治九年間疊遭大雪人畜凍斃遊收之所藏庫無款那濟請飭川省先行撥銀三四千兩等語達木一帶連年被災自應速籌賑恤著恩麟等卽於藏庫軍餉項下先行那用派委妥員前往該處查明被災重輕覈實散放毋令一夫失所其那用餉項若干由恩麟等覈明行知吳棠迅速照數籌撥解藏歸款將此由五百里各諭令知之○左宗棠奏狗齒牙卽楊繼芳等逆經陳湜密飭河州撫回馬占鰲擒獻訊辦其死黨虎滿喇前經鹽茶廳城防回勇哨長楊馥廷護

解雷正綰營訊辦又中衛縣長流水新撫回民金生智獲逆目黑
卯廖馬二利木等解總兵馮南彬營訊辦其馬才棕一犯據獲賊
供已於上年轟斃此外各起零回經靈州鹽茶固原平涼隆德靜
甯會甯安定靜遠各防營掩捕追剿擒斬多名特其中有無著名
賊目非獲賊訊明及撫回指認不能悉也察看近日情形北路自
甯靈鹽茶一帶至蘭州已無成起逆賊擾掠之事惟敗殘餘匪多
或數十騎少則十數騎數騎竄伏空山俟便突出見有官軍則竄
逸無迹雖於大局無害而千餘里防軍林立未得解嚴蓋土著之
回路徑熟悉賊數既少蹤迹易藏官軍臨之如狼捕鼠較之剿辦
大股翻形喫力也見飭各將領挑派哨隊分伏僻處遠近民堡相
機圖之又奏甘南零匪節經官軍痛剿每恃深山密箐爲遁逃藪
四月十一日提督殷華廷偵賊竄西和之香山自率兩哨尾追以

兩哨繞出山前賊甫至半坡山前隊伍以槍礮仰攻賊悉力抵禦
殷華廷已率隊度嶺潛出其後賊遑遽橫逸擒斬頗多餘逆竄白
家關殷華廷計賊蹤當出桃坪十二日冒雨馳往賊已先期逸去
十五日聞賊踞小川子兵至賊又遁二十一日提督蘇家良所部
總兵王銘忠趙得禮擊賊鐵佛寺斬二十餘名獲馬十餘匹二十
二日設伏宗淡溝賊果由溝出截殺十餘名生擒十四名二十六
日升任甘肅提督李輝武所部總兵鄧貴華副將劉楚華躡賊於
李家溝賊憑險力拒鄧貴華揮軍衝擊斃悍賊十餘名賊潰走殷
華廷踵至亦有斬獲是日總兵楊德俊按捕至雪水河馬賊百餘
正就深林休息官軍奄至立斬數名遂北至趙家山賊回馬力抗
楊德俊扼其前別以馬步分路襲其後賊窘甚悉向深林狂竄盡
棄其馬正飭各營分路入箐撥剿瞥見步賊二百餘循山徑東來

楊德俊徑前薄之賊不戰而退走追至白草坪賊據尾抗拒鏖戰三時官軍鼓勇齊登賊跳巖死者甚眾兩戰計殺五十餘名賊之跌斃者無數生擒三名五月十一日賊攻朱家河民堡參將楊世俊聞報馳往賊列隊迎拒飭馬隊分三路鈔擊賊越山狂竄遊擊張成倫已繞據山巔截之追騎至斬賊百數十名而還十三日餘賊總遁秦家河巖谷深阻誘之不出忽有股匪自太石河至與該逆合乘夜潛逃十八日提督田連考截擊於岳家壩斃賊三十餘名二十日楊世俊追抵階州譚家壩署階州知州洪維善飭總兵楊隆昌率寶營自後夾擊賊敗奔南坪山二十二日賊穿林走馬家壩分路埋伏以拒追者楊世俊飭寶營跟蹤猛追別以馬隊鈔擊伏賊殺賊極多內有黃旗賊目一名且追且殺踰老灘河至漫平田連考又由花馬地方橫截而出亦有斬馘二十三日餘賊奔

佛八巖楊世俊追及殺賊數十名二十八日又追及之於禮縣秀山截賊爲兩一奔馬家山一奔包家山其馬家山一起經田連考邀擊亦回竄包家山合股西竄二十九日追至白家關沿途接斬數十名餘賊又分竄碧玉河一隄壩等處訊據賊供賊中頭目凡五一馬麥成一劉三皆陝回一蘇舍立一馬姑九一馬麻兒皆鹽關土回劉三馬姑九已經陣斬餘尙未知下落比各軍續報六月初六七日勝仗零匪就撫餘均殄滅均報聞○吏部以大學士文祥應定何殿閣請得旨著授爲體仁閣大學士○予陝西陣亡遊擊李運堂祭葬世職○庚寅諭軍機大臣等劉長佑馮子材奏官軍暫畱越南並勦辦各屬土匪各摺片劉玉成等所部兵勇見因越南尙未派兵接防一時不能入關馮子材已照該國所請暫畱鎮柳選建等營扼紮太轄見籌選練防軍慎固封守辦理尙妥卽

著劉長佑馮子材照會該國迅速派兵接防一面飭令劉玉成等先就成所各營認真挑汰俟大軍入關卽於邊境各要隘妥籌布置毋稍疏虞思南太鎮及北流岑溪等處土匪見經次第搜捕巨夥殲除該撫等仍當飭令派出各營及地方文武迅將逸匪悉數捕獲毋畱餘孽並將善後事宜妥爲區畫以衛地方此次勦匪出力各員著准其擇尤彙案請獎毋許冒濫將此由四百里各諭令知之○飭江西等省撥銀一百一十萬兩協濟黔餉○壬辰諭軍機大臣等奎昌等奏遵旨遣撤安插棍噶札勒參營眾一摺棍噶札勒參見帶索倫馬步民兵三百餘名由臺路徑赴塔城其厄魯特兵隊俟將所帶喇嘛親族安插阿爾台山後再行赴塔業經奎昌等發給口分雇備駝馬於六月十三日拔營西進惟棍噶札勒參所部雜湊成軍營規未必整肅該呼圖克圖性復喜事尤當妥

爲駕馭方能就我範圍刻下所部索倫厄魯特官兵全赴塔城人數不少富和當申明紀律加意約束毋令滋生事端並著奎昌等隨時確探妥籌兼顧不得因該營已赴塔城遂存膜視另片奏科城積欠應撥烏城官兵口糧據常順等咨商劃撥餉銀通融採辦懇請飭撥折支軍糧銀五萬兩等語著照所請卽由戶部如數妥籌撥給此項銀兩一時未能解到准由軍餉銀內先行動支每石口糧照議折給銀四兩俟軍務告竣仍著照章辦理將此由五百里各諭令知之○兵部議覆原任兩江總督曾國藩續議兩江水師章程一外海六營分爲三起輪流巡哨一內洋五營分界管轄按期會哨一裏河五營各按汛地巡緝一淞南淞北太湖左右四營各添船三號每號配兵十四名一水營所遺陸汛分撥附近各營兼管一京口三營原轄之大沙洲撥歸陸汛巡防一狼山鎮屬

海門營改隸蘇松鎮管轄一蘇松三營陸汛原畱陸兵一百名加
畱四百名千總把總外委共十員上海畱兵二百名汛弁兩員一
江面失事處分卽照前次會議章程覈議一應造船隻分別派營
駕駛一裁撤千總八員把總二十四員改設外委三十四員以符
定制一酌定外委薪糧一外海六營營官衙署各給差兵十名一
水師提鎮兼轄陸營例馬照舊支給不得兼支坐船太湖右營係
以都司爲營官應給坐船二號一內洋五營升拔考驗照外海水
師例辦理裏河五營照內河水師例辦理一增添彙書五十三名
書識二百八十六名一裏河水師各船需用旗幟號衣等項每年
發銀製給一加給水師提督及蘇松狼山福山三鎮總兵官巡洋
經費彙書書識五年役滿考職送部一外海內洋各船其配礮位
六百一十六尊洋槍八百八十桿一各船火藥經費在上海蘇州

各局領給一新立各營官兵俸薪養廉等項每年約需銀二十三萬兩有奇不至浮於舊額以上二十一條均應如所奏辦理從之○乙未諭軍機大臣等曾璧光等奏剿除牛角坡逸匪並攻拔香鑪山賊巢殲除逆首李宰腐等下游一律肅清一摺黔省下游苗教各匪疊次肆擾勢甚猖獗經曾璧光等會同湘軍實力攻剿見在下游地方肅清辦理甚爲妥速惟苗疆甫定營制未復自應畱兵鎮撫以資彈壓卽著曾璧光等酌畱精兵一萬五千名分投扼紮遇有藏匿餘匪悉數捕獲以期淨絕根株毋得稍有鬆懈上游興義郡城已經何世華等攻克僅餘新城賊巢未下諒不難指日收復並著曾璧光等飭令該總兵等會合滇軍迅圖恢復毋任遲緩黔省素稱瘠苦辦理善後需用孔殷著曾璧光於協餉解到後督同司道妥籌辦理並將兵勇酌撤以節糜費將此由五百里諭

知曾璧光並傳諭周達武知之○丁酉諭軍機大臣等左宗棠穆圖善奏涼州兵勇分剿竄回情形一摺鎮番縣屬有大通一帶竄來陝回並南山等處土回沿途裹脅居民肆行搶掠經在防各軍隨處截剿餘匪向西沙窩遁去其古浪縣屬賊匪及竄擾永昌縣屬之陝回亦經各軍迎剿獲勝餘賊遠颺卽著左宗棠穆圖善飭令王仁和督率兵勇併力搜捕務絕根株穆圖善另片奏交卸省防後應否帶隊赴任抑或移紮西安請旨遵行等語河州撫事漸次就緒西甯一帶劉錦棠見統各營前往相機剿撫左宗棠自可進駐省垣居中調度穆圖善交卸省防原應卽赴本任以重職守第甯夏見尙安謐且有張曜所部駐紮足資鎮攝陝西爲甘軍後路糧餉所關此時南北兩路時虞零匪竄擾且新撫回眾分別安插之處均距陝界非遙非得力隊伍扼紮要隘懾以聲威不足戢

犬羊反覆之性著該將軍於左宗棠進省將見辦防務分晰移交後統帶所部馬隊並挑選步隊率以東行在陝西乾那一帶擇要扼紮妥籌防剿以副委任穆圖善所部分布近省各要隘尙稱得力左宗棠到省後派兵接防是否足敷分布儻不敷扼紮即可將該將軍所部酌量畱防著與穆圖善妥籌辦理穆圖善應俟該大臣布置妥協後再行拔隊東進至該將軍籲懇陛見之處著俟軍務大定再行奏請將此由五百里各諭令知之○諭本日據穆圖善片奏交卸省防後應否帶隊赴任抑或移紮西安已諭令該將軍督率所部馳赴乾那一帶駐紮矣武毅右營勇丁潰散二百餘名並有戕害營官情事是否係曹克忠所部見在已否安謐如何懲辦穆圖善馳赴陝境自能彈壓鎮攝以杜亂萌惟此項勇丁竟敢肆行不法久畱該處亦恐不能得力如該將軍所帶各隊到齊

後足敷分布即可將武毅右營及其餘隊伍酌量裁撤免滋紛擾
若尙須酌留應如何布置箝束儻須遣撤應揀派何員管帶出境
以免逗遛陝疆致貽後患均著體察情形迅速奏明辦理至曹克
忠與穆圖善共事多年才略性情知之必悉其接統劉銘傳所部
及新募各營能否整頓駕馭並著穆圖善就近詳察據實具奏○
予甘肅陣亡副將張忍祥祭葬世職○戊戌諭內閣前據德泰奏
駐藏辦事大臣恩麟擅賞戴琫花翎及巡閱營伍並未親到蒙混
入奏各節當經降旨令恩麟明白回奏茲據奏稱上年勦辦不法
總堪布班墊頓柱因戴琫拉旺奪結帶隊奮勇賞給翎支當經咨
明達賴喇嘛其巡閱後三汛營伍一節因番民苦瘡由各番官呈
請免往從前奏報漏未聲敘至巡捕戈什哈等酌給翎支並未給
予印照各等語恩麟於所奏各節雖係事出有因究屬不合恩麟

著交部議處卽著來京當差○諭軍機大臣等何璟奏已革提督
擅自出外請飭地方官嚴加管束等語已革提督李世忠前經降
旨交地方官管束何以任聽出外游弋見在雖無滋事實據難保
不故態復萌該地方官漫無覺察深可痛恨著何璟派員押令該
革員迅回固始本籍毋任沿途逗留解到後並著錢鼎銘嚴飭該
地方官隨時管束毋任潛行外出儻該革員再或他往無論有無
滋事卽著就地嚴拏治以違旨之罪以遏亂萌何璟等不得稍存
姑息之見該地方官如再視爲具文任令他出一經發覺必將該
縣嚴加處分該管各上司亦一併嚴處不能再邀寬典毋謂言之
不豫也將此各諭令知之○諭傳諭廣東提督張曜張曜奏官軍
剿辦竄匪疊次獲勝一摺甯夏西路地方自本年四月初二至六
月十三等日疊有陝回竄擾延及蒙境經張曜派撥兵勇分路剿

擊並於阿拉善各蒙古境內斃賊多名見在和果勒厄拉等處已無賊蹤卽著張曜督率沿邊各營實力防守並勤加偵探遇有賊匪竄近卽行截擊並飭提督孫金彪等於柳林湖各要隘嚴密扼守一面兼顧蒙境毋令賊匪竄入甯夏各回見已歸業該提督仍當隨時稽察彈壓毋令滋生事端○諭恩麟德奏奏循例查閱後藏三汛營伍一摺據稱布魯克巴部長來稟欲求達賴喇嘛助給銀兩並懇賞給僧官廉俸且以毗連披楞隱躍其詞意存挾制定日聶拉木邊界時有廓爾喀人入境等語江孜後藏定日三汛爲哲孟雄聶拉木隘口緊要門戶自應加意防範布魯克巴部長稟求助銀賞俸究竟是何意見德泰見已啟程前往後藏三汛校閱營伍著卽將邊界情形詳細訪察並將布魯克巴及哲孟雄部眾設法防閑毋滋他患其定日聶拉木邊界營伍務須力求整頓以

資鎮壓一切辦理情形著於巡閱事畢據實具奏本日已有旨將恩麟交部議處令其來京當差新任駐藏大臣未到任以前所有應辦事宜仍著認真經理不得稍涉大意將此由四百里各諭令知之○己亥諭內閣御史邊寶泉奏督臣呈進瑞麥恐滋流弊並請將永定河合龍保案撤銷各摺片國家愛養黎元惟期年穀順成從不侈言符瑞李鴻章前以直隸清苑縣暨廣平府等屬呈報麥秀兩歧據以入奏並將麥樣進呈在該督雖不至意存粉飾第恐各該地方官藉此導諛貢媚殊於吏治民風大有關繫嗣後各該督撫務當勤恤民隱於地方水旱情形隨時察看力求補救不得率以瑞應嘉祥鋪張入告用副朝廷痼瘕在抱之意近聞永定河北岸隄工潰決順天南路及保定天津所屬州縣均有水患兼有被蝗之處著李鴻章迅速查明永定河決口及各州縣被災情

形究竟若何據實具奏前據李鴻章奏保永定河合龍出力人員摺內聲稱全河兩岸隄埝均已培補堅厚何以又復潰決在工各員所司何事著李鴻章查明參奏並著該部將前次保案即行撤銷○禮部尙書存誠卒賞銀五百兩治喪予祭葬諡勤恪○調靈桂爲禮部尙書以阜保爲禮藩院尙書英元爲左都御史調延煦爲倉場侍郎志和爲戶部左侍郎恩承爲刑部左侍郎綿宜爲禮部右侍郎以繼格爲盛京兵部侍郎

由左副都御史遷

○庚子諭內閣昨

據御史邊寶泉奏稱永定河決口情形當經降旨令李鴻章查明據實具奏並將在工各員查參撤銷前次保案茲據李鴻章奏稱上月大雨時行河水盛漲消洩不及各隄多有蟄動均經隨時搶護惟北下汛十七號水高過隄大溜越隄而過搶救不及遂致漫口請將在工各員分別參辦並自請議處等語永定河隄工前經

李鴻章奏報合龍並稱兩岸隄埵均已培補堅厚乃爲時未久卽有決口之處在工各員未能小心防護咎無可辭石景山同知王茂燠著革職畱任署北下汛宛平縣縣丞候補主簿唐照著革職畱工效力永定河道李朝儀著革職畱任以示懲儆李鴻章督率無方著交部議處卽著該督嚴飭在事員弁迅將決口趕緊堵合務臻堅固不得稍有草率其全河各段隄工並著隨時加意保護毋稍疏懈○予陝西被戕遊擊周欽輝祭葬世職○甲辰諭軍機大臣等傳諭署漕運總督文彬文彬奏擒獲幅匪首惡正法並擒緝餘匪一摺幅匪朱小五等被擒後匪首朱方茂潛匿宿遷西南之朱家圩內經文彬飭令總兵歐陽利見等督率兵勇前往密拏並令投誠幅首王見勳解散黨與覓綫協捕擒獲朱方茂凌遲處死辦理尙屬妥速惟匪黨李際平在逃未獲亟應密速偵緝以淨

根株王見勦一犯雖據投誠究難深信著文彬嚴飭在事各員會同各地方官迅緝餘匪毋任漏網並飭姚廣武等將王見勦嚴加約束責令躡緝幅首李際平務獲懲辦不得稍涉輕縱致貽後患

○乙巳欽奉 慈安皇太后 慈禧皇太后懿旨皇帝大婚禮著於本年九月十四日寅時皇帝升太和殿遣使行冊立禮本日申時皇帝詣慈甯宮行禮畢升太和殿遣使行奉迎禮皇后鳳輿卽於皇帝升殿遣使還宮後由乾清宮啟行十五日子時皇后升鳳輿進宮後丑時行合巹禮十七日丑時皇后詣慈甯宮行朝見禮十八日辰時皇帝詣慈甯宮行慶賀禮畢仍於辰時皇帝升太和殿行慶賀禮十九日卯時皇帝升太和殿筵宴其慈甯宮筵宴時刻著由內傳旨屆時舉行○丙午左宗棠奏提督徐占彪周視肅城惟西南地勢居高賊於距城三十里之塔爾灣堅築堡垣環

以濠卡連接黃草壩各賊堡與肅城相爲犄角欲規取肅城非先奪塔爾灣堅堡不可維時肅州城外小麥漸次欲熟而賊仍固匿不出各營連日出隊刈麥以絕賊糧兼以誘賊雖小有斬獲卒未得一痛擊也五月二十七日徐占彪飭駐紮三仙洞之提督黃虎臣每日出隊雷臺廟一帶牽制該逆示形於東而親率馬步五營裹帶行糧同署肅州鎮總兵王子龍並調紅水臨水團丁夜趨塔爾灣飭副將桂錫楨率馬隊爲兩路策應抵塔爾灣時天尙未明分所部爲十隊各指一堡攻之賊不意官軍夜至倉卒抗拒官軍已乘間躍入立破數卡各賊堡正圖抵禦而官軍已徑薄堡根火器迸注槍礮雷轟堡中火起守賊奪門四竄自寅至巳攻克賊堡四座墩卡十九座生擒十餘名塔爾灣堡之賊出紅白旗來援馬隊擊卻之旋即閉堡不出徐占彪揮軍圍攻賊拚死拒守徐占彪

就地爲營是夜復分隊襲破附近墩堡六座其焚墩自竄者又十餘座是日黃虎臣師抵朱家堡城中以步賊出禦正接戰間突有馬賊數百東趨三仙洞桂錫楨回軍擊之殺賊數十名而奪其馬馬步賊均返奔入城二十九日徐占彪調開花礮連轟塔爾堡謀報城賊出馬步數千分道西馳來援徐占彪按陣不動靜以待之馬賊數百一近陣前旋即縮退徐占彪知其有伏飭提督陳春萬出北路繞伏賊之後王子龍擊其前賊分途接戰馬隊橫攻之賊敗遁追抵黃草壩始收隊而還三十日飭各團丁分道刈麥以馬隊由三仙洞往來游駛爲疑兵仍分軍輪攻塔爾堡晝夜不息六月初一日肅逆又以悍股赴援凡三次悉經馬隊擊敗陳春萬復乘勝攻獲東大堡生擒賊渠萬長金自鳴斬之賊益洵懼塔爾堡東焚堡夜遁者蓋以十數計初二日徐占彪進紮黃草壩督正營

歸化等營圍攻塔爾堡益急是夜軍功回目藍明泰奮威先登守
備徐春先繼之立將塔爾堡攻克賊鮮得免者獲千斤大礮一尊
槍械數百件牲畜稱是訊據生賊供稱二十九日之戰口外回目
萬長赤斤老二千長冶老四已經官軍陣斬初三日徐春先攻開
文殊山前堡二座其餘七座亦已夜遁塔爾灣以上賊壘空矣初
四日各營分攻黃草壩三堡未下初五日徐占彪繞堡東築營絕
其糧道連破賊墩數座賊知不敵開堡競逃斬馘無算復乘勝克
小堡二十餘座於是肅城西南墩堡百餘座均一律蕩平各營合
紮沙子壩距城僅三里初六日大南門擁出賊眾五六千均穿白
衣紮白巾加縛黃紙前斜排兩行中排方營後列散隊蓋賊中所
謂喪門陣也既成列殺一婦人一狗於陣前似爲壓勝之術者旋
狂譟齊撲官軍營壘徐占彪令各營勿出俟賊之前隊盡過中隊

徑薄陣前中營鼓聲起各營奮威衝出賊殊死鬪參將蕭蘭玉以
開花礮向賊叢測準轟擊桂錫植率馬隊徑穿賊陣賊隊大亂徐
占彪揮軍乘之躍蹤追殺尸橫遍野直追至城根始行收隊獲匪
供稱馬四之弟馬六元帥額角中礮子眾賊搶回城中是日戰斃
關內外逆回兇渠數名馬步悍賊無數蓋徐占彪攻肅第一惡戰
也賊之排喪門陣以出也誓決死戰迨二段方陣撲近營前時方
晴明將弁均奉令按隊挺刃以待忽西北雷聲大震黑雲飛壓賊
陣雷雨交作各營聞鼓聲奮躍衝入賊陣賊方驚悸之餘繩藥盡
濕官軍所用多洋槍不畏風雨人人喜荷神助以故縱橫盪決所
向披靡然將弁之亡傷者亦二十餘員賊之兇悍亦略可見矣初
八日賊踞州城南門外枯樹堡喉賊眾伏麥地向營開放叉子槍
官軍分路衝截斃賊數十名賊收回枯樹堡初九日賊數千由南

稍門出分駐香莊大小四堡城中旋出賊千餘仍伏麥地向營開
放又子槍比官軍出隊分擊伏賊按斬十餘名堡中賊槍雨注馬
勇陣亡四名受傷二十餘名營官武朝聘右腕亦帶子傷徐占彪
得報自洪水馳回卽夜馳赴城南見渠流忽斷知該逆正堵塞渠
口遣騎馳往覘之擒斬六名仍決渠口引流而下十二日徐占彪
仍督隊割麥誘之賊仍不出十三夜徐占彪挑勇卒潛襲南門外
三里許賊築新堡克之賊分竄入城僅獲斬十餘名卽移營駐紮
十四日賊千餘排列四壩堡前後比官軍出隊則縮入堡開槍俯
擊徐占彪令團勇蛇行渠內亦以叉子槍測準轟擊斃賊二十餘
名賊隊稍多處以開花礮轟之傷賊亦多追至城邊收隊十五日
辰刻城賊七八千由南門遙擁而出仍伏麥地時開槍向營轟擊
徐占彪飭各營按隊勿出僅以劈山礮遙轟之是日天氣炎熱未

申之交賊已困乏槍聲漸稀中營鼓角齊鳴桂錫楨李洪超由北路秦玉盛黃祖福由南路藍明泰齊懷松由中路徐占彪率宋賢聲康得勝李玉山程連璣等繼之各領所部橫躍入陣將賊衝爲數段立斬悍賊百餘名受傷者不知其數生擒五名賊眾紛潰遁入枯樹堡是夜徐占彪令各步營選銳卒百人與馬隊之趨捷者數百人襲取香莊廟大堡四更銜枚而進甫近堡前斬巡哨賊四名徐占彪令各營隊伍分伏左右揮壯士先登噴筒火彈齊發賊酣臥始覺倉卒不知所爲壯士畢登將香莊堅堡攻克斃賊數百名千總孫三級手斬千長馬建功守備鄭先平勇丁牛金勝生擒阿渾張景幅訊據供稱馬納斯阿渾也又據賊目馬七俱稱六月初六日之戰賊中千長斃者十餘名千長萬長受傷死者尤多內有萬長楊才已經官軍擒獲訊據楊才供認不諱遂令與張景幅

羈押一處以備質訊肅城首逆又哀詞乞撫徐占彪諭以且決數戰再議見在城外麥禾已割者甫及一半城外堡卡雖破除殆盡護禾之賊屢經擊敗兇狡渠目擒斬已多然攻堅究無善策非多備攻具加派勁旅廣儲糧料不能確操全算臣宗棠赴省城後自當察酌情形妥爲籌辦以冀稍紓 聖主西顧之憂 上諭軍機

大臣等左宗棠等奏官軍偪剿肅州踞匪並中衛一帶截擊竄匪情形各摺片逆匪久踞肅州負隅抗拒見經徐占彪一軍屢次偪剿攻拔近城之塔爾灣堅巢並掃蕩城西賊壘百餘座擒斬著名逆目多名剿辦甚爲得手逆匪經此懲創兇餒稍衰自應乘此聲威力圖攻克該逆前次降而復叛見又哀詞乞撫難保非因攻剿緊急暫爲緩兵之計左宗棠見已進紮省城著卽酌度情形妥籌調度檄飭徐占彪督率各營迅速圍攻並將關內外援賊隨時相

機截勦則孤城自不難力拔陝回由涼州屬境竄出邊外復由阿拉善旗入邊肆擾雖經防軍擊退惟賊蹤飄忽去來無定且蒙古地方亦恐被其蹂躪著左宗棠飭令譚拔萃會同黃鼎所部各營探蹤截勦並知會張曜派軍合力兜擊悉數殲除毋任紛竄穆圖善著仍遵前旨俟省防事宜交代清楚再行率隊東行並著與左宗棠會籌一切以期共維大局將此由六百里各諭令知之○左宗棠奏甘北逆目狗齒牙卽楊繼芳等伏誅後鹽茶固原東西兩山逆目僅馬母驢李萬海在逃未獲六月二十一日陝西提臣雷正綰將馬母驢卽馬成榮並其死黨二十餘犯悉數弋獲臣批飭處以極刑甘南回目蘇舍利夫馬姑九率殘匪二百餘款營呈繳馬械已發交總理營務處按察使陳湜分別安插其清水逆目鄧大有一犯已經階州防營三月二十六日轟斃海珍等一起零匪

七月初一日總兵馬有才截之王家堡悉數擒斬李萬海一犯經提督蘇家良於七月初八日生擒解營訊明磔死所有著名各首逆均已辦竣後路已就肅清臣於七月十五日進駐省城調派各軍致力西路以清邊圉報聞○丁未諭軍機大臣等左宗棠穆圖善奏馬隊官兵擊剿陝回獲勝一摺據稱陝回奔竄平番所屬之柳川口一帶經副都統常明督帶馬隊追擊斃賊四百餘名餘匪入山逃遁等語此次陝回由西甯逃出欲赴甘涼一帶搶掠雖經官軍中途截擊其竄逸之匪仍恐四出滋擾著左宗棠等飭令在防各軍隨時偵探遇賊卽擊以清餘孽前經左宗棠奏崔禹等逆盤踞大小南川已令劉錦棠何作霖等由碾伯進剿刻下該逆曾否他竄該大臣務當飭令劉錦棠等迅速進兵乘土客交訐之時痛加剿洗就地殲除毋任遠竄甘涼致西路又被蹂躪其西甯土

同如果真心就撫仍著督飭馮邦棟妥慎辦理毋稍苟且將此由
五百里各諭令知之○戊申遣禮部尙書靈桂爲正使總管內務
府大臣春佑爲副使持節詣 皇后邸行納采禮並筵宴如例○
前任兵部侍郎彭玉麟奏請俟病體稍痊啟程入覲仍懇恩准回
籍養病得旨該侍郎此次查閱長江水師認真整頓力戒因循實
堪嘉尙著將應辦各事料理清楚卽行來京陛見以慰廑繫○已
酉諭軍機大臣等都興阿奏股匪乘間竊發隨時剿辦並請將剿
捕得力之員恩准擇保各摺片奉天賊匪滋擾多年邊外地方尤
爲奸徒遁迹之所雖疊經奏報拏獲多名正法究未能淨絕根株
此次昌圖復有股匪糾聚多人焚搶鋪戶抗拒官兵實屬不成事
體雖兵勇會同剿捕殺斃甚多而餘匪各處奔逃難保不乘機復
發著都興阿嚴飭各官兵暨 方文武迅將敗逃餘匪悉行搜剿

盡數殲除不得以目前稍就安謐卽行鬆懈其疊次勦匪出力員弁著准由都興阿擇保數員毋許冒濫仍當責令該員弁等實力搜捕隨時四出梭巡淨絕盜源以靖閭閻而安邊圉將此諭令知之○改福建淡水廳訓導爲教諭定學額八名永廣二名增設噶瑪蘭廳訓導定學額五名永廣一名○庚戌諭軍機大臣等前因武毅右營勇丁潰散並有戕害營官情事當經諭知穆圖善俟左宗棠進駐蘭州省城卽督率得力兵勇移紮乾那一帶並察看曹克忠能否得力所部勇丁如何分別撤畱令該將軍悉心酌度奏明辦理茲據邵亨豫奏稱曹克忠接統銘軍後駕馭未能得宜時逾半年與兵將總不浹洽該提督久患足疾於營哨各官疏於接見軍心已搖訛言四起附近居民紛紛遷徙營弁亦多乞假請飭李鴻章密籌辦理等語軍營統帥全在謀勇兼施聯絡軍心申明

紀律曹克忠既不能約束勇丁致令戕官潰散是其不勝統帥之任已可概見近復患病不能接見營哨各官則其兵將離心猜疑日積勢所必至此軍素稱勁旅見在不但無益陝防且恐滋生事端致滋後患著李鴻章悉心籌畫將曹克忠所部銘字一軍應如何撤回安插俾有用之兵不至潰散爲患地方是爲至要穆圖善於行抵乾那後妥爲布置俾銘軍去留得以迅速酌定不至日久患生邵亨豫於銘軍未撤之先務當不動聲色妥爲調處以弭亂萌該署撫原片著鈔給李鴻章穆圖善閱看此旨關繫軍營大局穆圖善近在甘肅務當飭令在營各員不得稍有洩漏致生他變提督成祿被參各節穆圖善前奏已派員前往訪查何以日久尙未查覆並著該將軍迅速查明據實具奏毋再延緩○予陝西被戕總兵官楊祺祭葬世職○是月豁免湖南晃州廳被擾上年額

賦綬徵山東濮州等四州縣暨東平所被水雹新舊額賦

八月丙辰命戶部酌撥銀十萬兩濟庫倫軍餉○丁巳諭軍機大臣等前因曹克忠接統銘軍不能聯絡兵心申明紀律致令戕官潰散深恐猜疑日積激生事端當經諭令李鴻章悉心籌畫撤回安插茲據該督奏稱銘軍素極整肅經此變易習氣頗難挽回必得平日威望與將士素孚者接統然後撤回安置可漸順手請飭在籍臬司劉盛藻赴直籌議等語遇缺提奏按察使劉盛藻向隨劉銘傳在營帶隊約束嚴明最稱得力此時曹克忠所部銘軍兵將既不相洽若不易人統帶必致以百戰勁旅悉行潰散後患殊深著英翰傳知劉盛藻兼程前赴天津聽候李鴻章面授機宜迅行赴陝接統銘軍妥撤回南徐籌安置以弭隱患不得稍涉遲回致滋貽誤穆圖善何日自甘東來該將軍既經帶有得力兵勇將

來行抵乾州即可無庸畱調銘軍致滋搖惑李鴻章摺著鈔給穆
圖善閱看○諭豫師奏辦理西甯撫局並擊賊獲勝情形一摺陝
回暨米拉溝西馬營回眾雖呈繳馬匹器械其中尚有觀望不決
暗行出擾情事西甯回眾所繳馬匹較多據豫師奏稱近頗安分
仍當防其更變未可稍涉疏虞見在左宗棠已派提督何作霖等
分統十六營赴湟兵力厚集豫師常隨時會同該提督等將反側
逆回痛加剿洗其真心悔罪者方准投誠斷不可一意主撫致貽
後患此中操縱機宜仍著咨商左宗棠妥慎籌辦新添堡一帶突
有陝回竄擾經黃武賢派隊追擊餘匪敗遁回巢仍著督飭各軍
加意嚴防毋任賊縱紛竄另片奏西甯專餉已派員分赴各省坐
催在陝設立西甯運局兌收轉解毋庸由西征糧臺催提墊發以
免拖累等語卽著照所請行其各省解餉按月報部事宜仍著袁

保恆照舊辦理將此由五百里諭知豫師並傳諭袁保恆知之○戊午諭軍機大臣等景廉奏奇古官軍輕進失利咨商榮全規取瑪納斯城各摺片據稱提督張玉春因西路委員桂洪元營官沈廷秀約令進兵該提督帶隊二百餘人馳抵古牧地突有烏城逆回勾結安集延馬隊攻撲營盤眾寡不敵遂致挫失等語此次張玉春誤信委員之言不候批示冒昧輕進致損軍威實難辭咎著先行摘去頂翎責令立功自效以贖前愆倘再不遵調度貽誤戎機卽照軍法懲治委員桂洪元擅行致函張玉春調兵進剿並有不必稟明都統之語實屬膽大妄爲著卽提訊明確從嚴懲辦以肅軍令見在官軍旣爲逆匪襲敗難保不乘勢東犯亟應妥籌布置備豫不虞靖邊左營見已到坤著景廉卽飭該營拔赴古城會合前敵各營聯絡聲勢嚴密防守刻下軍情緊要景廉所部兵力

尙單著成祿懷遵前旨迅飭李天和統帶所部剋期赴巴里坤聽候景廉調遣不得藉詞延緩榮全前有規取瑪納斯之議若能設法進兵亦足牽制賊勢仍著榮全酌度機宜妥爲籌辦回酋馬明如果真心反正卽著景廉善爲駕馭俾爲我用景廉另片奏前撥西征糧臺銀十萬兩成祿截留銀四萬兩其餘銀六萬兩尙未解到等語著成祿將前項銀兩迅卽派員解赴景廉軍營以應要需毋稍遲誤將此由六百里各諭令知之○庚申命單懋謙爲大學士調毛昶熙爲吏部尙書以李鴻藻爲工部尙書桑春榮爲左都御史調錢寶廉爲刑部右侍郎以宜振爲工部右侍郎候補侍郎○實授邵亨豫陝西巡撫以畢道遠爲倉場侍郎候補侍郎○壬戌命文煜等整頓福建營伍○以桑春榮爲刑部尙書胡家玉爲左都御史轉彭久餘爲吏部左侍郎調童華爲吏部右侍郎以何廷謙爲工

部左侍郎

山內閣學士遷

○癸亥左宗棠奏肅州附城賊巢自塔爾灣黃

草壩等處攻克後惟城東朱家堡牆堅濠深賊恃以爲固又城北

北巖頭城南枯樹城東南四壩等處墩堡環峙徐占彪已率隊繞

紮肅城西南而畱護運道及畱紮三仙洞各營遠在城東若枯樹

及四壩地方不卽收拔則兩路官軍終虞隔閼六月十七日徐占

彪飭正營進紮校場以東適城逆數百出南城刈麥密飭馬隊繞

城根截其歸路朱家堡及枯樹各堡出隊爲援徐占彪親出擊敗

之其刈麥者亦逃入枯樹堡追斬數十名生擒六名盡奪其牲畜

麥捆城卡槍礮攢發官軍亦有傷亡徐占彪詳審城勢枯樹三堡

六墩負城設險必繞城濠以襲其後遂親挑奮勇百二十名夜率

以行仍設隊河灘作勢仰攻並調開花礮向堡轟擊逆賊憑牆外

禦徐占彪已繞伏城濠以洋礮測準擊登陴者守賊應聲而倒餘

賊驚潰各墩堡同時竄逸夜黑未及窮追遂移營填紮其堡二十一日偵報賊出東門繞竄東南料必赴塔爾灣搶收餘麥率馬隊追及之賊捆載將行見兵至驚走追斬數十名四壩麥穗黃熟該處賊堡几十一緊連朱家堡二十一日飭新左新中及三四起馬隊繞東關濠邊撲入兼堵朱家堡援賊飭正右歸化副右攻其南徐占彪率副將桂錫楨護開花礮馳入壩中左右轟擊又令副新後兩營由三仙洞橫攻各堡自卯至午副新後兩營先破東大堡一座餘堡奪門四竄追斬極多旋移軍紮入加築木城所遺三仙洞營壘以團勇填紮自是東西兩路各營始聯成一氣是夜新後營又襲破雷臺廟東面大墩黎明瞥見西廢堡有踞賊馬隊擊走之二十四日城逆馬四具稟請退兵十里願獻城自贖徐占彪稔其詐不允攻朱家堡益急於該堡南北各營卡斷其運糧及出

汲之路閱一晝夜工竣賊益洶懼二十五日各營備攻具填濠齊進徑薄賊牆賊棄堡狂奔追殺極多調右營進紮該堡自是肅城東西南三面賊壘盡矣惟北巖頭有廢堡尙有賊踞十九日徐占彪率隊馳往賊窟聚麥地且刈且縛曳以牛車官軍擊之賊潰遂焚其麥復偪追竄賊賊入廢堡中憑牆放槍徐占彪坐馬受傷棄馬步戰弁丁益奮立將此堡攻克餘堡之賊亦悉數擒斬於是附城概無賊壘七月初一日徐占彪率隊歷北稍門至西門賊惟憑牆施放槍礮誘之不出遙見西北山邊有賊刈麥揮隊投殺斃賊數十名獲賊供稱萬長馬行五已爲官軍所斬歸歷塔爾灣遇有刈麥零賊盡殲之城賊終不復出初二日復出歷各壩迄無賊蹤撤隊後城逆遠以三四百名出東門割城根餘麥桂錫楨回軍馳擊殲悍賊多名餘悉滾濠鳧水而逸上諭軍機大臣等徐占彪

一軍攻剿肅州逆匪疊克枯樹四壩北崖頭各壘卡及朱家堡堅巢附城賊蹤一律掃蕩辦理尙屬得手肅州之賊疊經懲創自己勢孤膽落著左宗棠等檄飭徐占彪乘此聲威穩慎進取以期力拔堅城毋得輕率受撫致爲賊匪所紿至成祿一軍久駐高臺尙無行期疊據奏稱車馬糧石均形缺乏此軍雖難期得力然使因糧缺譁潰必致貽誤地方左宗棠務當飭令甘涼肅二道妥籌接濟不得稍存膜視將來此軍進止朝廷別有權衡也將此由五百里各諭令知之○命都興阿等嚴捕盛京馬賊○乙丑諭軍機大臣等錢鼎銘奏檢獲匪首李六地方肅清一摺匪首李六雖經拏獲訊明是否卽行正法刻下地方雖已肅清仍恐皖豫交界一帶伏莽未清若不將餘匪搜捕淨盡難保不暗中踉伏伺隙復發著錢鼎銘嚴飭在事各員認真搜緝務將餘黨悉數捕獲以消後患

並著飭令各該地方官將編查保甲各事宜實力奉行毋稍疏懈

將此諭令知之○以恩齡爲左副都御史

降調刑部侍郎

○命康國器來

京以文格爲廣西布政使

前廣東布政使

○己巳遣禮部尙書靈桂爲正

使總管內務府大臣桂清爲副使持節詣

皇后邸行大徵禮○

諭軍機大臣等榮全富和奏查明保陞參款懇准畱營富和奏整

頓臺站榮全奏接閱俄國來文各摺片保陞不能約束兵丁以致

騷擾臺站咎有應得據榮全等訊明臺站官兵亦實有供支遲延

藉詞躲差情事情尙可原保陞業經革職著暫緩鞫問畱於軍營

充當苦差以觀後效保陞所部參領等五員見均摘去頂帶分別

懲辦其滋事兵丁仍著榮全等確切查明從重懲治以儆效尤不

得含糊了事至臺站官兵支應要差日形疲玩積弊甚深見當整

頓臺站之時豈可任其廢弛富和以各臺稽壓文報勒索賞需請

明定章程革除惡習均係臺站應辦之事著卽知照各城將軍大臣等於所屬各臺一體申明舊章實力整頓不得有名無實至榮全接閱俄官來文其意不欲中國官兵前往伊犁託詞以緩我師榮全已將接濟官兵銀兩交克柯色本等運赴伊犁分給以安眾心自係權宜辦法仍著懍遵屢次諭旨妥慎籌辦瑪納斯爲伊犁東來要地務當設法早籌收復見在吉林官兵業經到齊糧石可以收穫宜及時整備隊伍妥爲調度以期進取英廉查探情形若何著榮全隨時酌度相機辦理俄國駐京使臣倭良嘎哩如有與總理各國事務衙門商議之處已諭該王大臣隨時知照矣將此由五百里各諭令知之○庚午諭軍機大臣等前因何璟奏已革提督李世忠擅自出外請飭嚴加管束當諭令何璟派員押令該革員迅回固始本籍並令錢鼎銘飭令該地方官隨時管束茲據

英翰奏稱李世忠雖與叛匪李四輩子同族彼此向有仇隙該匪起事時李世忠外出業經兩月該革員之子李顯謨一聞警信卽赴省馳告並將李四輩子家屬誘獲復隨同官軍追拏餘匪李世忠在上海得信後卽由輪船旋皖見已接取家屬擬在安省地方暫住以避物議等語李世忠果能安分守法朝廷自當保全不使無地自容茲據英翰將該革員見在情形縷晰上陳著准其在安徽地方居住責成英翰隨時查察如有不法情事一面密速具奏一面相機辦理毋貽地方之害○允李鴻章奏截畱江北漕米十萬五千八百餘石賑畿輔被水災民○辛未諭內閣彭玉麟奏提督傷病未痊請開缺回籍調理等語長江水師關係緊要黃翼升自簡任提督以來巡閱操防是其專責遇有庸劣不職各員卽應隨時參劾以肅營伍乃直至此次彭玉麟巡閱各鎮該提督始行

會銜參奏殊屬顛預至該提督所收外來候補人員至二百七十餘員之多亦屬不合本應卽予懲處姑念該提督從前帶兵江上屢著戰功從寬免其置議長江水師提督黃翼升著准其開缺回籍調理○諭彭玉麟奏酌籌水師事宜請旨遵行一摺長江水師控制數省關繫綦重彭玉麟所陳四條切中時弊深堪嘉尚提督一缺管轄江面五千餘里非有智識閱遠天資忠亮並秉性剛方威克厥愛及操守清廉敬慎畏法者難以勝任著統兵大臣及各直省督撫隨時畱心自見在候補提鎮以至偏裨其才識足任此缺者卽行密保候旨簡用其各營弁勇有才堪造就者並著責成各鎮將隨時咨明提督及沿江各督撫畱心考察次第擢用不使有用之才沈淪末秩用備干城之選軍營以誠樸爲先水師初設均能勤苦耐勞所向有功乃近來竟有修飾廚傳講究應酬等事

種種惡習深堪痛恨所有各營攤派名目著永遠禁革儻有仍蹈故轍私立名目者卽照剋扣軍餉例治罪該管督撫提鎮徇隱不參劾者別經訪聞一併治罪以肅軍律長江水師經兵部議定不得撥用別項水師人員定章最嚴近來該管提鎮有意見好濫收外來人員一標至二百數十員之多迫經彭玉麟查閱且有並無其人者營制紛雜幾不可問著照該侍郎所擬提標止准酌畱三四十員各鎮標止准酌畱一二十員此外概行遣撤儻所畱各員弁有不安本分暨別有嗜好者卽隨時參革毋得稍存姑息各員弁用竣後不准再行濫收如有缺出專於長江水師兵勇中拔補水師額兵出缺卽於本地招募藉資得力提督總兵本屬平行長江水師豈容歧異卽著遵照定制辦理遇有各總兵所屬汛地員弁缺出卽由該管總兵揀員署理咨明提督請補如提督敘補非

人該管總兵亦卽咨明更正用資整頓而杜弊端另片奏請停止水師肄習弓箭以期專精一技等語水師所用本以使枪放礮爲優劣何得藉口演習弓箭致開陸居之漸著照所請所有長江水師及江蘇新改之外海內洋內河水師均著專習槍礮毋庸兼習弓箭該提督隨時操演及考拔各缺亦著照舊章辦理經此次訓諭後提鎮及各該管督撫等務當隨時訪察遇有前項情弊卽行從嚴參辦庶不至真才廢棄陋習日深用副朝廷廩念東南整飭戎行至意將此通諭知之○癸酉諭內閣金順自簡放烏里雅蘇台將軍後督帶所部由甘肅甯夏啟程赴任行至山西包頭地方駐紮屢次有旨嚴催徘徊不進嗣據該將軍瀝陳赴任未能迅速自請交部議處並請帶隊赴甘肅甘涼鎮番一帶效力前驅朝廷格外施恩不加譴責俯允所請原冀其力圖振作稍贖前愆迺遲

至數月始據奏稱馳抵甯夏籌布鎮番防剿事宜並無啟程前往甘涼鎮番之語且以會剿蒙地竄匪爲詞直欲安坐甯夏郡城遙爲控制實屬意存取巧大負委任金順著開烏里雅蘇台將軍之缺交部嚴加議處仍著迅速拔隊剋期西進儻再遲延朝廷惟有執法從事毋謂言之不豫也懷之○諭軍機大臣等金順奏馳抵甯夏籌布鎮番防剿事宜並派隊會剿蒙地竄匪一摺覽奏實堪詫異金順駐軍包頭徘徊觀望久未赴任朝廷念其行役之艱允其西征之請已屬格外體恤且冀其失之東隅收之桑榆也該將軍受此重寄宜如何感激圖報踴躍前驅乃自六月中旬拔隊後遲回兩月始抵甯夏又不遵旨卽赴甘涼等處扼要駐紮輒以籌商軍糧及布置鎮番防剿爲詞意圖久駐甯夏實屬有意遷延大負委任見在肅州回匪雖經徐占彪進剿屢勝而賊尙負隅成祿

一軍出關無期非得一支勁旅前往接濟不能迅奏膚功著金順
卽日督率所部由甘涼鎮番一帶鼓行而西徑赴肅州到肅後卽
行奏聞聽候諭旨河州撫事已定西甯等處左宗棠見已派撥勁
兵相機剿撫金順率旅西行專赴肅州一帶於撫局並無妨礙至
蒙地竄匪防剿事宜本係張曜專責該將軍若再分兵會剿則西
進之兵轉行單薄著卽督飭程朝立等與劉宏發各營接踵前進
毋再遲延沿途軍糧卽著知照張曜代爲籌畫該將軍不得藉口
糧運艱難耽延時日經此次訓誡後金順當激發天良力圖報稱
毋再巧爲嘗試自速愆尤將此由五百里諭令知之○甲戌命鄧
廷枏來京以俊達爲廣東布政使張瀛爲廣東按察使
由河南開
歸陳許道
○乙亥諭軍機大臣等都興阿奏拏獲搶劫盜犯並請將疏防
劫餉之總兵議處各摺片奉天馬賊充斥屢經諭令都興阿等嚴

飭所屬認真勦捕茲據奏稱先後拏獲盜犯一百六十七名正法該匪等擾害地方股數甚眾雖經屢次拏獲夥匪而著名要犯漏網尙多難保不日肆蔓延釀成巨患著都興阿瑞聯恭鏜懷遵疊次諭旨嚴飭帶兵員弁及地方文武將各處首從匪徒一律搜捕淨盡務絕根株毋稍鬆懈總兵張得祿駐紮新民屯距興隆甸甚近於餉鞘被劫一案毫無覺察著交部議處都興阿前奏未經聲明附參著一併交部議處本年三月間有人奏金州協領書明額等匿災縱勇及牛莊防守尉果勒明阿縱賭釀盜以致連劫當行等情當交都興阿等查奏迄今已逾半年之久各匪犯已否拏獲何以尙未奏覆殊屬玩延著該將軍等迅速查明據實具奏將此各諭令知之○賞普濟堂功德林賑米八百石○戊寅予廣西陣亡參將劉希賢祭葬世職○己卯諭內閣恭親王等奏纂輯勦平

粵匪方略四百二十卷剿平捻匪方略三百二十卷告成奉表恭
進一摺剿捕粵匪始於道光三十年至同治四年克復江甯省城
嗣後搜捕餘孽又歷年餘剿捕捻匪始於咸豐元年至同治七年
在直隸地方併力殲除計辦理軍務前後十有九年各路軍營及
內外臣工章奏紛繁我 文宗顯皇帝神謨廣運 指示機宜

聖訓昭垂軍民感服迨朕御極後稟承 慈安皇太后 慈禧皇
太后懿訓燭照無遺同符 先烈戡定大難用底敕平一切機宜
運畫允宜垂示將來恭親王等奉命纂辦數年來率同在館人員
陸續繕輯呈進隨時披覽卷帙繁多尙爲詳悉賅備所有大小出
力各員自應普加優獎恭親王等摺內雖自稱不敢仰邀議敘仍
應特沛恩施恭親王著賞加二級並欽奉 慈禧皇太后頒發御
書許謨辰告扁額一方賞給恭親王以示優異文祥寶璽沈桂芬

李鴻藻均著賞加二級該提調等在軍機處行走有年平日辦事俱屬勤慎此次在館總司纂輯或分司檢校均能奮勉出力迅速告成著照所請給予獎勵其餘謄錄供事人等著俟陳設本全行完竣後由恭親王等覈其在館功課及平日差使分別等第造冊註明咨部獎敘其應如何過班銓選之處均由該部覈辦該謄錄供事等當差勤苦異常出力所有從優給予分發各員加恩照所請行○詔添撥京倉米二萬石部庫銀六萬兩賑順天所屬被水災民○辛巳吏部以大學士單懋謙應定何殿閣請得旨著授爲文淵閣大學士○諭各省關卡除賑荒米穀外各項工程物料不得概免釐稅○諭戶部籌撥銀十萬兩濟烏里雅蘇台軍餉